

usteaz honen lehen agiriaren berri ematen du, hitza hobeto ezagutzearen lagungarri.

e) OKA ETA ELGE FORMEN JATORRIAZ ZENBAIT GOGOETA

A. Irigoyen jaunaren txostena, *Oka* eta *Elge* formen jatorriaren nondi-kotasuna eta hoiien zenbait aldakuntza eta geografizko edaduraz. Eta batez ere Euskal Herriko Mendebalean ugariago agertzen dela aipatuaz.

Ohi den otoitzarekin bukatu da batzarra.

Euskaltzainburua
LUIS VILLASANTE

Idazkaria
Juan San Martin

1976 - VIII - 22

DAVANT JAUNAREN EUSKALTZAIN SARRERA HITZALDIA ETA LARZABAL JAUNAREN IHARDESPENA

Maulen, 1976ko abuztuaren 22an. Hiriko elizan eman zen elkar mezaren ondotik, goizeko hamaika t'erdietan herriko etxean bildu dira, bertako haurzapez den Supervielle jauna buru delarik, L. Villasante euskaltzainburua, J. Haritschelhar buru ordezkoa, A. Irigaray, A. Irigoyen, P. Lafitte, E. Larre eta P. Larzabal euskaltzain jaunek; M. Jauregiberry andere ohorezko euskaltzaina; N. Alzola, J. L. Alvarez Enparantza, P. Andiazabal, I. Berriatua, P. Bordazaharre "Etxahun", P. Duny-Pétré, J. B. Etcheberry, M. Hegiaphal, R. Idiart, M. Itçaina, R. Kamblong, X. Kintana, E. Knörr, J. L. Lizundia, X. Mendiguren, S. Onandia, M. Ugalde, P. Uriharren, J. Zaitegi, J. J. Zearreta euskaltzain laguntzaile jaunek San Martín idazkari dela. Euskaltzaindikoez gainera hiriko agintari eta populua.

Diharce, Hiriart-Urruty, Satrustegi eta Zavala jaunek ezin etorria adiarazi dute.

Supervielle haurzapez jaunaren agurrezko hitzekin hasi da biltzar irekia. Villasante euskaltzainburu jaunak, biltzarkideak agurtuaz eta egungo batzarre honen programa adiarazi ondorean Zuberuako euskaltzain eta idazle zaharren oroitzak ekarri du: Lhande, Eppherre, eta beste euskaltzainkideen arteko eta lehengo idazle ospetsu haietarik, Tartas, Oihenarte, d'Abbadie, Chaho eta abar.

Ohi den bezala, bi euskaltzainek lagundurik, Jean Louis Davant euskaltzain berria sartu da batzarreko saloian, eta ekin dio bere sarrera hitzaldiari. Zuberotar euskal idazleei buruzko gomuta orokorraren ondorean d'Abbadie eta Chaho zirenen bizitza eta laneri buruzko azterketari lotu zen. Erromantiko horiek gure herriko literaturan eta ideietan izan zuten arrakasta azpimarkatzen du, d'Abbadie olerki egunak antolatuz eta Chaho politikari bezala.

Ondorean P. Larzabal euskaltzain jaunaren ihardespena, hitzaldi laburrez J. L. Davant jaunaren bizitzaz eta ekintzaz: laborari inginiadore,

historia ikertzaile, zenbait libururen egile, irakaskintzari loturik dagoena eta euskarari anitz oren eskainia eta oraindik bere gaztarotik zerbait gehiago espero genezakeala, Euskaltzaindian sartzea geldirik egoteko ez denezkero.

Euskararen alde orain arte egin dituen lanen esker erakutsiz eta aurrerakoen pozgarriz, euskaltzainburuak diploma eman dio.

J. L. Davant jaunak batzarkideen txalo beroak jaso ditu.

Batzarra bukatzean herriko etxeak aperitib batera gomitatu gaitu, eta ondoren anaitasunezko bazkaria izan da Hostelleria du Château delako jatetxean.

Euskaltzainburua
LUIS VILLASANTE

Idazkaria
Juan San Martín

1976 - IX - 24

Donostian, Gipuzkoako Diputazio Jauregian, 1976ko irailaren 24an, arratsaldeko lauretan bildu dira: L. Villasante buru, A. Arrue, J. L. Davant, X. Diharce, A. Irigoyen, E. Larre, P. Lafitte, L. Mitxelena eta J. M. Satrustegi euskaltzain jaunak; P. Altuna, J. M. Aranalde, M. Atxaga, J. A. Etxebarría, S. Garmendia, J. Intxausti, E. Knörr, J. M. Lekuona, J. A. Letamendia, J. L. Lizundia, J. A. Retolaza, J. Zaitegi, A. Zatarain eta J. J. Zearreta euskaltzain laguntzaile jaunak, J. San Martín idazkari dela.

Haritschelhar, Irigaray, Lojendio euskaltzain jaunak ezin etorria adiarazi dute.

Ohi den otoitzarekin hasi da batzarra.

Uztaileko eta abuztuko batzar agiriak onartu dira.

P. Lafitte jaunak laster joan beharra agertu du eta, eguneko gaietan, bere txostenari aurrea eman zaio.

a) KOSKA ETA ENTTERKA HELETAN, PIARRES LAFITTE JAUNAREN TXOSTENA

Herri guzietan ohiturak ez dira berdinak *hi*-ka mintzatzen eta Heletako ohituraz zenbait adiarazpen ematen ditu. Herririk gehienetan haur ttipieri *zu* eta haur helduagoeri *hi* egiteko ohitura da, baina Heletan adinak ez du ezer ikustekorik. Hango familia batean azterketa egin ondorean jakin zuen koskari *hi* eta entterkari *zu* esaten ziotela. Eta, han, *entterka* "introvertido" da eta *koska* "extrovertido".

b) HAR-EMANAK

Educación y Ciencia-ko Ministergoaren gutuna, Euskaltzaindiaren nortasunez, historiaz eta arautegiaz egingo duten liburuxka Bilboko Imprenta Industrial S.A. inprimategiaren esku uzten dutela eta gure esku